

Bolaodi ba Meedi ba SARS le SAPS ba hapa khokheine ya boima ba 378kg

Tshwane, 24 Hlakola 2023 – Bahlanka ba Bolaodi ba Meedi ba Ditshebeletso tsa Lekgetho tsa Afrika Borwa mmoho le ba Ditshebeletso tsa Sepolesa sa Afrika Borwa ba bile le letsholo la ka matjeke hoseng ha kajeno ho kgaoletsa sekepe sa dikhonteina mane boemakepeng ba Durban mme ba fumana khokheine ya boima ba 378kg ka hara e nngwe ya dikhonteina tse sekepeng seo.

Khokheine ena e hlwekileng, eo boleng ba yona bo lekanngwang ho ba tjhelete e kana ka R1.3billion, e ile ya fokiswa ka mora letsholo la beke kaofela la mautlwela le neng le etelletswe pele ke yuniti ya SARS e bitswang *National Targeting Unit*. Dihlopha tsena tsa yuniti ya mawatleng ya SARS (SARS Marine unit), Ditshebetso tsa Durban (Durban Operations), Ditshebeletso tsa Sepolesa sa Afrika Borwa (SAPS) Ditshebeletso tsa Mautlwela a Botlokotsebe le Bofokisi ba Naha (Crime Intelligence and National Detective Services) di ile tsa kena sekepeng sena se neng se tswa mane South America ka sepheo sa ho hlahloba dikhonteina tsa palo e itseng tse ileng tsa hlwauwa ke SARS.

Dikhonteina tsena di ile tsa hlahlojwa ka mora hore di laollwe mane boemakepeng ba Durban. Hlahlobo ena e ile ya sibolla dihlahiswa tsa tshepe ya zinki mmoho le mekotla e mengata e metsho e neng e kentse ditene tse 378 tsa khokheine e hlwekileng.

Morwalo ona o seng molaong mmoho le se bonahalang eka ke sesebediswa sa selfounu di ile tsa nyehelwa ho SAPS hore ba tle ba etse diphuputso tse ding.

Khomishenara ya SARS Edward Kieswetter o thoholeditse mosebetsi ona o kgabane o entsweng ke diakgente tsohle tsa phethahatso ya molao letsholong lena.

“Ka ho sebetsa mmoho, mmuso o bontshitse hape hore o lomahantse meno ho lwantshana le dimpe tsa dithethefatsi tse fetolang semelo tse kenang ka naha le ho senya maphelo a basebedisi ba tsona, haholoholo batjha.

“SARS e ka se mamelle diketso tsena se seng molaong mme e tla tswela pele ho phethahatsa thomo ya yona ya ho bebofatsa kgwebisano e molaong ho tshehetsa ntshetsopele ya ikonomi ya naha ya rona,” ho rialo Mong. Kieswetter.

Ho fumana lesedi le fetang lena, ikopanye le SarsMedia@sars.gov.za